

Siunnersuut: Kommunit aqunneqarnerat pillugu Inatsisartut inatsisaata allanngortinneqarneranik Inatsisartut inatsisaat nr. xx af xx. xxx 2013-meersoq

Saqqummiussissut

(Aningaasaqarnermut Nunamullu Namminermet Naalakkersuisoq)

Siullermeerneqarnera

Kommunit aqunneqarnerat pillugu Inatsisartut inatsisaata allanngortinneqarneranik Inatsisartut inatsisissatut siunnersuut Naalakkersuisut sinnerlugit matumuuna saqqummiutissavara.

Siunnersuut una tassaavoq 2012-imi upernaakkut ataatsimiinnermi kommunalbestyrelsinut, nunaqarfinut aqutsisunut aamma ilagiit sinniisaannut ilaasortassanik qinersisarnermut Inatsisartut inatsisissaattut siunnersuutip aappassaaneerlugu saqqummiunneqartup oqaluuserineqarnerani taamani Naalakkersuisut akissuteqaatit saqqummiussaanni oqaatigineqartunik malitseqartitsineq.

Aqutsinermi inatsimmut allannguutissatut siunnersuut manna najukkami ataatsimiititanik pilersitsisoqarsinnaanissaanut kommunit aalajangersaasinnaanissaanut annertuumik periarfissiinissamik imaqarpoq. Peqatigisaanik siunnersuutip nassatarissavaa kommunit periarfissaqalissasut najukkami ataatsimiititaliani ilaasortat aalajangersimasunik amerlassusilinnik amerlanerpaaffissalernerqarsimasunillu akissaateqartinneqarsinnaalissasut.

Kommunini tamani pissutsit assigiinngisitaartuuneri aallaavigalugit najukkami oqartussaaqataanermut tunngasut ineriartortitsivigineqarsinnaanissaat siunertaralugu kommunit namminneerlutik oqalliffiusarsinnaasunik pilersitsiortorsinnaanissaat Naalakkersuisut pingaartutut isigaat. Taamaattumik najukkami ataatsimiititaliat pillugit kommunit namminneerlutik aaqqissuussisinnaanissaat siunnersuut annertuumik periarfissiivoq. Tassunga atatillugu Naalakkersuisut isumaqatigaat Kommuneqarfik Sermeersuup siunnersuutaa – KANUKOKA-mit tapersorneqartoq, najukkami ataatsimiititaliat amerlassuserisinnaasaat killilerneqassangitsoq.

Aamma borgmesterit soraarnerussutisiaqartinneqartarnerannut tunngatillugu Naalakkersuisut nutaamik maleruagassiorsinnaanissaanut aalajangersakkanik siunnersuut imaqarpoq. Maleruagassat taakku nassatarissavaa borgmesterit siunissami soraarnerussutisiaqartinneqartarnerat Inatsisartuni Naalakkersuisunilu ilaasortat soraarnerussutisiaqartinneqartarnerannut naligiissinneqarnerat. Naalakkersuisut taamaaliornermikkut KANUKOKA-miit kissaatigineqarsimasumut akuersipput.

Kiisalu kommunalbestyrelsimiit sulingiffeqarallarnissamik qinnuteqaateqartoqartillugu qinnuteqaatip ilusiligaaneranut tunngasunik uppersaatinillu tunniussisoqartalernissaanik

piumasaqaateqartoqartalernissaanik siunnersuut imaqarpoq. Tamanna ilaasortap napparsimaneranik imaluunniit allatut naleqquttumik tunngavissalimmik pissuteqarluni kommunalbestyrelsip ataatsimiittarneranni qaammatit marluk sinnerlugit peqataasinnaannginnermut tunngassuteqarpoq. Siunnersuutip aamma qulakkiisavaa sulinngiffeqarallarnissamik qinnuteqaateqartoqartillugu kommunalbestyrelsit tunngavissaqarluarlutik qinnuteqaammik suliarinnittarnisaat.

Allannguutissat annikitsut allat siunnersuutip imarisaanut nassuiaammi oqaaseqarfigineqarput.

Naalackersuisut matumuuna naammagisimaarlugu oqaatigissavaat, KANUKOKA aamma kommunit sisamaasut siunnersuutip imarisaanut tapersersuimmata.

Taamatut oqaaseqarlunga Naalackersuisut sinnerlugit siunnersuut Inatsisartuni suliarineqartussangortippara.